



Notat

Dato: 28.03.2017
Arkivsak: 2016/4130-31
Saksbehandlar: oddber3

Til: Utval for opplæring og helse
Administrasjonsutvalet

Frå: Fylkesrådmannen

Organisering og leing ved Hjeltnes i perioden 01.08.17 til 31.07.18

Bakgrunn

Under handsaming av politisk sak «Produksjonsskule og fylkeskommunal aktivitet på Hjeltnes» gjorde Fylkestinget 07.03.2017 følgande vedtak:

1. Hordaland fylkeskommune stør opp om arbeidet med å etablere produksjonsskule på Hjeltnes. I 2017 skal arbeidet med å etablere ein produksjonsskule med statleg finansieringstilskot prioriterast. Prosjektgruppa som er oppretta, skal med utgangspunkt i eksisterande prosjektskisse og vedtakspunkta frå fylkestinget 05.10.16 arbeide vidare med dette. I det vidare arbeidet skal prosjektgruppa supplerast med ein representant frå Hjeltnes/Ulvik. Statleg finansiering bør vere avklart innan utgangen av 2017. Prosjektgruppa skal mellom anna vurdere skulen si organisatoriske plassering og kva investeringar som er naudsynt. Utlysning av stilling som dagleg leiar av produksjonsskulen skal gjerast så snart finansiering av tilbodet er på plass. Tidlegaste start av produksjonsskule vil vere hausten 2018. Fylkestinget skal i mars 2018 ta stilling til ramma for ei eventuell etablering av produksjonsskule.
2. I budsjetthandsaminga for 2018 skal det takast omsyn til drift og investering knytt til produksjonsskule og investeringstrong til nytt fagskuletilbod. Alternativt kan dette handsamast som ei tilleggsløyving i fylkestinget i mars 2018.
3. I perioden fram til 08.2018 skal ein oppretthalde mellombels drift på Hjeltnes. Det inkluderer fagskuletilbod for arborist, Vg2 Landbruk og gartnarnæring (vaksenopplæring). Kantine- og internatdrifta skal oppretthaldast dei dagane det er elevar/studentar på skulen. I denne perioden skal ein vurdere ei mest mogleg tenleg framtidig forvaltning av eigedomen mellom anna med tanke på å legge grunnlag for anna næringsverksemd. I dette ligg det at hovudaktiviteten skal konsentrerast om gardstunet, og ein skal vurdere sal/avhending og regulering av eigedomane og oppseiing av langsiktige avtalar. Dette skal gjerast i dialog med mellom andre Ulvik herad.
4. Bustadhusa «Austtun» og «Vesttun», som ikkje er i direkte tilknytning til gardstunet, skal seljast så raskt som mogleg. Holmen nord for fylkesvegen skal vurderast med tanke på regulering og sal/avhending i dialog med Ulvik herad. Holmen sør for fylkesvegen vert planlagt brukt til

produksjonsskule. Sal med langsiktig leigeavtale kan og eventuelt vurderast.

5. Areal som har langtidsleige skal vurderast med tanke på oppseiing, men areal som ligg i nærleik til gardstunet og vil vere tenleg å behalde med tanke på produksjonsskule, skal vidareførast. Alle eksisterande avtalar skal vurderast i høve til oppseiing eller vidareføring.
6. Dersom Stortinget i revidert nasjonalbudsjett alt våren 2017 vil gå inn for å medverke til oppstart av produksjonsskule på Hjeltnes, kan denne framdriftsplanen kunne verte forsert. Hordaland fylkesting vil difor sterkt oppmode regjeringa og Stortinget om å ivareta dette behovet .

I vedtakspunkt 3. går det fram at det skal vere ei mellombels drift på Hjeltnes til ei eventuell etablering av produksjonsskule i perioden frå 01.08.2017 til og med 31.07.2018. Dette inneber:

- Fagskule – arborist
- Vaksenopplæring – Landbruk- og gartnarfaget - Vg2 og Vg3
- Internat- og kantine drift
- Kontoradministrasjon
- Gardsdrift
- Reinhald
- Eigedomsdrift
- Sjølvfinansierande oppdragsverksemd

Alle pedagogisk tilsette ved dagens Hjeltnes vgs er overført til skulane på Voss. Fagskuletilbodet for arborist vert administrert av Fagskolen i Hordaland. Vaksenopplæringstilbodet vert administrert ved VO-senteret på Voss gymnas, medan lærarane er tilsett ved skulane på Voss. Driftsleiar og reinhaldspersonell er tilsett ved Eigedomsseksjonen. Den resterenda aktiviteten vil utgjere om lag 5-6 årsverk, der i overkant av 3 årsverk er finansiert av oppdragsverksemd. Vedtaket frå 07.03.2017 tek ikkje stilling til den organisatoriske plasseringa i mellomperioden for denne gruppa tilsette.

Organisatorisk plassering og leiing

I saksframlegget til saka som vart politisk handsama i fylkestinget, peikar fylkesrådmannen på at det vil vere naturleg å plassere aktiviteten på Hjeltnes under Voss vgs i perioden fram til august 2018. Etter nærare vurdering ser fylkesrådmannen på dette som den beste løysinga. Voss vgs har svært gode føresetnader til å handtere den type aktivitet som vil vere på Hjeltnes i mellomperioden.

Dette inneber at Hjeltnes frå 31.07.2017 vil vere ei avdeling under Voss vgs. Dei tilsette innan internat- og kantinedrift, kontoradministrasjon, gardsdrift og oppdragsverksemd vil frå same tid vere tilsett på skulen.

Personalansvaret for avdeling Hjeltnes vil verte lagt til ass. rektor ved Voss vgs. Det er starta opp dialog mellom leiinga på Voss vgs og Hjeltnes om korleis dette praktisk skal organiserast.